

USB van voorste skole ter wêreld

DIE Universiteit van Stellenbosch Bestuurskool (USB) het meer as 30 plekke opgeskuif om homself as een van die top 40 van die 100 voorste bestuurskole in die wêreld te posisioneer.

Dit is volgens die Aspen-Instituut se 2009-10 uitgawe van sy alternatiewe Beyond Grey Pinstripes-opname.

Die USB het volgens die nuwe lys 31 plekke boontoe geskuif om die 39ste plek op die ranglys te beklee. Die USB is die enigste bestuurskool in Suid-Afrika, en op die Afrika-vasteland, wat op die top 100-lys verskyn.

Hoewel daar 'n verskeidenheid MBA-ranglyste bestaan, is die Aspen-Instituut se Beyond Grey Pinstripes-opname die enigste een wat verder as reputasie en toetsuitslae kyk om te bepaal hoe goed skole hul studente vir die omgewings-, maatskaplike en etiese kompleksiteite van die moderne sake-wêreld voorberei.

"In hierdie uitdagende ekonomiese tye is dit nie net studente nie, maar ook die algemene publiek wat vra wat met die gevestigde sakemodelle verkeerd geloop het," sê mnr. Rich Leim-sider, direkteur van die Aspen-Instituut se Sentrum vir Sakeopleiding.

"Beyond Grey Pinstripes-skole dink sinvol na oor nuwe benaderings. Hulle berei studente voor wat 'n meer holistiese siening van sukses het, veral een wat finansiële resultate sowel as maatskaplike en omgewings-impak meet."

Resultate van die Aspen-Instituut se opname, wat data van 149 bestuurskole versamel het, het bevind dat 69% van die skole in 2009 van studente vereis om 'n kursus oor sake- en gemeenskapskwessies te volg. In 2001

was dit 'n vereiste by 34% van die skole en in 2007 by 63% van die skole.

Prof. Eon Smit, direkteur van die USB, sê die opname bevestig dat die USB beduidende leierskap toon in sy inisiatiewe om maatskaplike, omgewings- en etiese kwessies in sy MBA-program te integreer.

"Die gebeure van die afgelope jaar het weer eens die behoefte aan groter klem op etiek in sake na vore gebring.

"Die USB volg die visie van 'n 'pedagogie van hoop', soos uitgedruk deur die Universiteit van Stellenbosch se visekanselier, prof. Russel Botman, vir Suid-Afrika en die groter Afrika-vasteland. Daarom het die USB navorsingsentrums geskep wat onder meer klem lê op volhoubare leierskapontwikkeling, konflikoplossing, bestuurstoetsing en etiek en die rol van sake in die gemeenskap.

"In die opleidingsproses word hernieuwe klem op persoonlike ontwikkeling, geïntegreerde kursusaflering en die koestering van positiewe waardes en houdings geplaas terwyl die analitiese ruggraat van ons internasionaal geakkrediteerde MBA-aangeraak bly," sê Smit.

Sake-etiek en korporatiewe bestuurstoetsing het die afgelope 20 jaar, en lank vóór die huidige finansiële krisis, 'n belangrike deel van die USB se MBA gevorm. Die USB was die eerste Suid-Afrikaanse bestuurskool om dit deel van sy MBA-program te maak en was ook internasionaal een van die eerste bestuurskole om dit te doen.

Die USB se MBA sluit 'n aantal keusevakke in wat ook aandag aan hierdie kwessies skenk.

Dit sluit in omgewingsfinansies, volhoubare ondernemings, spirituele leierskap en toegepaste veranderingsleierskap.

